

DAVANTI AL PRESEPIO

“Il Signore ci sorprende sempre” (Papa Francesco)

Anca quest'an ho fa ‘I presepi con la sua capanna
E dent el Bambin ch'el fa la nanna
Curà dal San Giusepp e da la sua Mama:
Intorna g'ho metu berit e cavret
Cont i pastor e i so regaj de poeret.
Intant pensavi a quel ch'el conta ‘I Vangeli:
I angiolit che canten: “Pas su la Terra e gloria nei Cieli”.
I pastor in tornà a ca anca lor cantando “Gloria!”
Dopo c'han vedu e ‘scoltà tutta la storia.

Som sta li ‘n moment poeu me som di:
“Sucedess ammò incoeu ‘na roba inscì?”
Alter che tornà a ca: sarien andà in delegazion
Sota i finester del Sindic a fa ‘na manifestazion:
Che l'è ‘na vergogna che de la pora gent
Sien costret a viv in d'ona stala con propi nient!

On quai vun d'alter el saria andà in Curia
Per domandag ai pret, in freta e furia
Se dag a tràa a quei Angiol c'aveven di
Ch'el Signor vegnu a salvam l'era quel Bambin li.

Adess i rob sarien divers
Perché l'è propi la Gesa a insegnam che el Signor de l'univers
L'è giust quel Bambin ‘pena nassu,
L'è propi Lu che me salva: el bon Gesù.
Ma fusser sta i pret che gh'era alora
G'avrien rispondu sicur, senza pensag a sora
“Quel Bambin li ‘l Messia? Figurass!
Se l'era ‘l Signor, in mezz a num el doeva nass!”

Pensela come vorì, ma mi som content
Ch'el sia nassu poerett per num che sem pora gent:
E come quel pastorel ch'el sta li incantàa
Davanti al presepi commoss e imbambolàa
Anca a mi me vegn el magon a stà li a guardà
El Signor ‘gnu giò dal Ciel per vegnim a cercà!

da Don Arnaldo